

四庫全書

集部

欽定四庫全書

集部

江湖小集卷

三十九至  
四十一

詳校官中書臣張姚成

助教臣常循覆勘

覆校官主事臣龔敬身

校對官助教臣胡予襄

謄錄貢生臣崔堂

欽定四庫全書

江湖小集卷三十九

宋 陳起 編

葉茵順適堂吟稿

垂虹亭

東西耕釣窟左右利名津倚遍闌干曲知幾有幾人

鱸鄉道院

田可耕兮園可蔬幾年夢不到亨衢山林受用琴書鶴  
天地交游風月吾事變無涯人老矣死生有命汝知乎

客來時復一杯酒畫作鱸鄉醉隱圖

送徐兄訪陳宰

投老持竿柳外村尺書久不抵修門料應下榻從容日  
自說通家好子孫

山行

舍棹入山村山深樹自繁短歌田舍樂長揖野人尊苔  
老雲生石松高月闔門不聞名利語太古一乾坤

瀟湘八景圖

平沙鴈落

江風飄塵白如練，征翰遠赴蘆花岸。  
寒霧昏昏漁火明，欲飛不飛行陣亂。  
相從萬里多崎嶇，呼鳴警察夜有奴。  
衡陽路杳速歸去，未可容易來江湖。

遠浦帆歸

水天冥冥日催暮，輕蒲飽風疾飛羽。  
回頭遙指舟前灣，浪急蓬欹下柔艣。  
稠楊枯桑深處村，老妻挾兒環在門。  
蓼羹香滑茅柴熟，對語別時應斷魂。

山市晴嵐

崑麓新霽浮紫烟幾家雞犬喧一鄣憧憧人得蠅頭利  
不了青帘酤酒錢松陰散亂日易暝風光漸入牛羊徑  
頽肩赤脚分途歸野唱樵歌動幽聽

江天暮雪

癡雲貼水天四垂寒鴉凍雀無樹棲紛紛萬頃水花亂  
光眩銀海迷東西中有輕舸移斷浦玉笠瓊蓑一漁父  
鼓柁而歌歌豐年田家有麥無愁多

洞庭秋月

長波淼淼七百里葭蕀颯颯西風起玉輪輾出琉璃宮  
碧落空明無表裏幾峰森列青崔嵬不知人世皆塵埃  
夜深絲竹遞清響疑是楚王曾歸來

瀟湘夜雨

雲氣浮江天已夕江樹號風飛雨迫淒涼正則賦懷沙  
疑與漁翁分半席一聲欸乃隔中流打篷淅霎添旅愁  
土膏動脉曉色媚農將有事于西疇

烟寺晚鐘

冥濛一抹籠崢嶸  
崢嶸深處傳疎聲  
溪橫古槎低欲折  
隱約前村通去程  
萬里征夫不知宿  
數盡飛鴉栖古木  
輸與中邊三四僧  
枯藤挑雲歸佛屋

漁林夕照

家家傍水開柴扉  
綠楊影裏沈斜暉  
妻炊黃梁子掛網  
獨枕莓苔眠釣磯  
得魚博錢平生志  
世間寵辱不能累  
路近桃源多裔孫  
定知秦晉興亡事

古意

逝波不可迴白鳥不可馴  
古人成感慨今人猶古人

又

境空納風月心遠辭埃塵  
終日窮目力得景亡天真

次韻

生涯老布衾清處更清吟  
舊事即新夢今人非古心意  
行雙謝屐道在一陶琴  
誰解無名利其中有淺深

次池亭韻

憑虛結草亭占得古來清睡債茶驅遣詩情酒發明梅  
撐拳石瘦蘆障一闌平未盡逍遙意重尋枕簟盟

秀實長子玉麟暮晡

門左蓬弧喜事新四朝先佛慶生辰峴峴已露峙頭玉  
表表因名繫角麟鼻祖同庚光後葉卯君著瑞定前身  
我來摩頂為兒壽一歲從今百歲春

琉璃砲燈

有魚

體製先天太極圖燈籠真是水晶無

張中庶知洋州人號水晶燈籠遠

看玉兔光中魄近得驪龍頷下珠一炷空明疑火燧寸  
波靜定即冰壺游魚且作沉潛計鱗甲成時入五湖

幼弟墓下

草庵扁看雲用少陵句

春到棗無色秋來松亦悲細看雲起處不復鴈歸時憶  
汝九京隔嗟予兩鬢衰寥寥今古意獨許杜陵知

室人墓下

楚愴埋香地卿須念藁砧齊眉中道訣同穴百年心刀  
尺凝餘澤松梧帶老陰可能如鮓婦相對白頭吟

次孫花翁韻

湖海幾經年論交豈偶然坐間尊島佛客裏識坡仙解  
使狂心服還羞懶腹便拈來唐句法元入小乘禪

范蠡

吳江三高祠

越敢吞吳皆范子後來廟食太湖濱邦人豈是忘仇怨  
要勉吳臣似越臣

張翰

鱸膾元不動鄉思拂袖西風已見幾江上如今來往客

但言鱸膾不言歸

陸龜蒙

江湖蕭散樂平生  
夜課圖書日課耕  
一段高風猶凜凜  
逢人肯說鴨呼名

文公談苑謂相傳陸龜蒙多智數狡獪有內養自  
長安使杭州舟出舍下童奴驅羣鴨出內養彈其  
一折頸龜蒙遽從舍出大呼云此綠頭鴨有異名  
善人言適將獻狀本州貢天子今持此死鴨以詣

官內養少長宮禁不知外事甚驚駭厚以金帛遺之龜蒙乃止因徐問龜蒙曰此鴨何言龜蒙曰自呼其名巧捷多類此子嘗觀其傳誦其文矣龜蒙字魯望居甫里著吳興實錄四十卷松陵集十卷笠澤叢書四集以高士召不至躬自畚鍤品茶評水不與流俗交升舟則蓬席束書筆牀釣具往來江湖間謂江湖散人或號天隨子甫里先生自比涪翁漁父江上丈人清風素節凜凜千古因疑談

苑所傳之過况予所居視甫里無一舍遠其地荒僻  
眇在松江之東去驛程猶有數十里使者無由過  
之自武宗暨昭宗凡六十三載未嘗遣內養使杭  
州揆之地理考之唐紀信其為誣豈談苑別有所  
據云

欲別

欲別哽無語蘸酒評歸期潮汐有朝暮郎心無轉移

次韻

懶作千年調，偷閒得幾回。  
吟壇元不峻，俗駕可曾來。  
蘇碧墻陰合，榴紅屋角開。  
枕肱真樂在，飲水當傳杯。

夜坐偶成

蓴鱸江上鄉，穩處着虛堂。  
却掃百念息，貪吟萬景忙。  
螢流風戶牖，蛙鬧雨池塘。  
夢熟田家事，牛衣趁蔕秧。

次月蝕韻

起來搔首夜如何，瞥見蝦蟆影裏過。  
幸自十分懸素魄，豈應一息駐妖魔。  
光清于水塵難滓，色白如圭玷可磨。

休誦玉川難險句終篇比興為元和

次弔原韻

為憐舉世不曾醒放浪形骸澤畔行會得危言危行意  
佐成濯足濯纓名義無可去緣同姓心亦何求要獨清  
今日龍舟雖古意吳人未必楚人情

笑靨花

簇簇瓊瑤屑花神點綴工似知吟興動滿面是春風

涵空閣

靈岩寺

浪說涵空未是空一闌羅列幾巖從世人若問空中景  
此景從來是夢中

草堂

幾年蝸蚓占山扉喚轉風光似舊時從此禪門多事在  
篆香重課少陵詩

琴堂

片石隣空掌樣平吳兒曾此御瑤琴琴中腔調誰人識  
獨有聲妃是賞音

洗粧池

離宮脂粉尚淳香人去僧來歲月長  
鐘磬吼成功德水根塵洗盡水清涼

卓筆峰

天平寺

疑是飛來天柱峰一尖秀出白雲中  
料應宰相書成後留得殘毫倚半空

一片峰

十丈蒼圭似削齊摩挹信是古來碑  
不刊二范忠勞績

合寫諸賢唱詠詩

頭陀岩

舊說頭陀坐石巔披肩壞衲不知年空岩聖得頭陀號  
啼鳥枯松也解禪

一線泉

銀潢萬丈下嵯峨想是天孫掛玉梭休道此泉絲樣小  
涓涓將見作江河

次韻

時清歎陸沉楚澤伴漁吟  
探索聖賢語發明天地心  
無機碁少着有趣樹多陰  
坐上皆知已賡酬夜向深

春晚

紅紫雨離披風光別壯時  
世情楊絮覺心事杜鵑知  
屋角溪連井林梢菊障籬  
幸無塵役役倚檻數晴絲

又

春色漸昏昏那逢日帶曛  
落花紅一尺新筍綠三分  
憶友盟留石尋詩思入雲  
風光到田舍瘦策看耕耘

自遣

偶對格

蟻夢功名覺即休，駒陰歲月去難留。  
傷今不復并三樂，擬古猶堪續四愁。  
松下抱琴塵外境，雨餘蒔藥柳邊洲。  
老來莫問浮生事，醉後同為造物游。

題順適堂

甫里相望江盡頭，得隣而隱了浮休。  
落花流水元無礙，野鶴孤雲儘自由。  
順裏委心彭澤賦，適時乘興剡溪舟。  
區區世上分蠻觸，對客忘言茗一甌。

曹娥廟

孝本當為事時人或不然娥兮知此理命也委之天五日抱屍出千年作史傳英靈猶耿耿有慊莫登船

憶弟

支藤來海嶠骨肉海西邊對月成千里舉頭同一天更  
沉寒戍角歌急晚湖船孤鴈傷予意聲聲落枕前

相逢

相逢疑舊識敲火自煎茶盛欲為留計其如未是家東

西分地脉南北兩天涯別後思君處空齋識燭花

自感

未險光藜杖逢亭便小留今番已非昔後去可能遊

又

倦聽花卿曲狂歌俠士行年華與心事醉裏自分明

山居

古木環池竹數竿疎籬補菊屋三間白雲不放紅塵入

無怪山人懶出山

元夕

一簇蓮燈亦可觀  
隔牆簫鼓二更殘  
平生未識繁華事  
旋借宣和國史看

省墓

隴上松杉手自移  
至今苔蘚半寒枝  
夢中不記重泉隔  
猶學兒童戲綵時

梅

霜月相摩漏二更  
書窓伴我一枝橫  
自矜前輩持清白

妬紫妖紅總後生

虎柙

生長古林丘擒來鐵繫囚休憐文變豹尚覺氣吞牛檻  
穿終難脫咆哮亦可休山中藜藿少君合早為謀

崇道叔慶七十

寄意南豐一瓣香願公耆艾熾而昌歷經七甲鬢浮綠  
帶錫萬釘眉映黃疑是函闕逢老子歸然魯國有靈光  
陰功更說燕山桂留與時人作義方

柳 禁烟霧風月翠綠眉舞八字

態度脂韋不自持對人無奈小腰肢好於彭澤歸來日  
瘦似章臺別去時隱隱輪蹄端不惡深深亭榭最相宜  
流鶯百轉春光老擬折柔條寄所思

可山寫梅

放出東風手段寫成江路枝梢君復無聲句法要與廣  
平解嘲

信步

九十日春未老兩三番醉如泥行遍菜畦麥隴未饒十里蘇隄

嚴子陵祠

橫足齟齬夢御牀祇將故舊視君王意嫌漢室乾坤小  
歸占嚴江日月長獨繭絲頭忘寵辱

獨繭絲  
出列子

生芻庭上

閱興亡留題多是功名士也為留題姓字香

參選有感

元是江湖瀟散客誰將幽夢落南柯十年不調幸然好

一着纔差悟處多肯使北山馳鶴信且隨西舍唱漁歌  
野人自喜無彈繳却恐金章羨綠蓑

春晚

閉戶蠶新浴開簾燕早歸何曾春欲去自是物華非

又

胡蝶夢中意杜鵑聲外愁問春春不語柳絮絮暗汀洲

詩僧

同住西州一水濱東州勝處始逢君詩成又逐行雲去

後日相思祇看雲

偶成

留得春風趁馬蹄日長無事綠楊堤  
菜花籬落誰家酒  
緩轡長歌過小溪

西湖

細桃深處五陵家隄柳陰中百寶車  
多是問桃尋柳去  
近來山下少梅花

憶友

蕭蕭簷角雨冉冉雨中舟年老難於別春寒重却愁風  
窓亂書葉塵壁暗燈篝夜半無來鴈披衣對小樓

次韻

疎窓小博山窓外鳥關關占得江湖隱佐成天地閒簷  
牙叢篠碧墻隙兩鳩斑癡坐不知晚漁篷捲釣還

次賦順適堂韻

萬卷藏書抵萬金翛然軒宇絕塵侵順時不作榮枯想  
適意元無勝負心蒲石疎簾真道院栢香淨几小叢林

四時剩有閒風月醒裏尋題醉裏吟

有所思

仰天有所思心遠目苦短西風驅殘雲千里月華滿

阿育王寺舍利塔

粒粟懸懸左角鐘幾年鎮壓梵王宮要知八萬四千所

舍利八萬四千所舍  
元在尋常一念中佛現紫金歸

勝地有八殊利勝僧誇烏石墜虛空育王擊塔行虛空

烏石今毫光起處無人見明月堂前五几東明月堂在

猶人形

塔之後

玉几山在  
塔之東

山居

朝踏山根雲暮歸雲中  
扉野鳥始驚避今鳥情依依異  
哉海上鷗猜疑未忘機

江湖小集卷三十九

欽定四庫全書

江湖小集卷四十

宋 陳起 編

葉茵順適堂吟稿

己酉生日敬次靖節先生擬挽歌辭三首

放浪宇宙間  
世事笑局促  
駸駸影中人  
不受時采錄  
奄然長夜歸  
賈志空山木  
昔日堂上歡  
今夕堂下哭  
哭之欲其生  
予亦不自覺  
天道元無私  
紛紛徒寵辱  
素心惟坡僊  
一死萬事足

又

自古皆有死載歌酬清觴嗟予早失怙艱阻亦備嘗母  
兮歲六十終古青松傍陟岡慟伯氏忘簪悲孟光後波  
逐前波同歸溟溟鄉飄風相飛旋輦鐸聲央

又

重雲翳蒼柏零露棲白蕭骨肉慕音容恍惚哀空郊肴  
核班几席椒漿澆岌堯人歸天已沫音昧紙錢懸枯條逝  
者如此耳暮暮仍朝朝暮暮仍朝朝人兮奈若何未死

不能樂既死空有家僮僕幾恩怨交朋幾悲歌若人會  
斯語屬和紛陽阿

既次韻或非之作解嘲

揆予初度日撫杯擬歌辭衰齡踰五十敢必登者希自  
傳始遷固誌銘傳牧之諦觀子儼疏直與浮世違靖節  
百世師汝無輕笑嗤諱之寧免歿不諱達者為假我以  
耆艾年年續斯詩

庚戌生日再擬去歲挽歌辭

憶昨歲莫止慨慷生死機擬韻追先哲持為自壽詩成  
篇示叔季心然口交非詎知不一霜季兮先露晞興思  
發永歎載言涕肆頤萬化同於盡彭鏗空龐眉日月不  
我與去去氣力衰且進尊中醪勿作兒女悲殷勤晉鼎  
心趨前舞萊衣

少陵騎蹇驢圖

帽破衣寬骨相寒為花日日醉吟鞍時人祇道題風月  
後世將詩作史看

孟浩然歸南山圖

笑指南山躍馬歸，明知舉似棄才詩。  
亭前千古標芳姓

襄陽有孟亭

未可窮通論一時

李白詩百篇圖

長安市上醉如泥，旁若無人且賦詩。  
誰識隱然為國計

沉香亭畔脫鞵時

岑參醉落魄圖

醉裏沉思世道危，不堪着眼只攢眉。  
空留忠憤聲名在

不見招歸舊日詩

岑著招蜀客歸一篇申明逆順之理抑佞邪之計  
今集中無之事見本集序

枕簟入林僻茶瓜留客遲十韻

人人苦炎歊於我覺太甚北戶其清涼萬事付一枕  
叩門真丈夫一揖棄拘檢人物晉風流班坐黃玉簟  
譚壘爭塵清詩壇傳令急今日有公事俗駕不可入  
墻外水泠泠水邊木陰陰相遇聊自適茲辰猶竹林

同為山澤臞半分漁樵席我不踐斯境誰肯賞茲癖  
意到景自到榮榮窓下花一張彭澤琴一甌陽羨茶  
有酒斟酌之歡然成誼譁何必五侯鯖李綠兮香瓜  
一會良不易載言翻令愁清風有時度白日不可留  
君顏猶少年我髮不勝幘百歲壘一邱主翁驚是客  
數面成骨肉子歸將何之長嘯盼天外雲意俱遲遲

酒邊次徐靈淵韻

柳外綠陰重綠陰生遠風温涼三月後醒醉百年中桑

禿吳蠶熟林幽蜀鳥空不祈朝市夢高卧太湖東

過舊相府

寂寞相公宅枯楊枕綠波老兵猶自語貴客舊曾過壁  
暗蛛生網門空爵可羅問他桃與李何處得春多

南塘偶成

靜向南塘驗物情東風又綠柳邊汀梅花密點殘碁局  
蝸篆斜題小硯屏浮世虛無春後雪故人零落曉來星  
逢時且進杯中醪休學懷沙賦獨醒

僧房夜坐

四十二間廊底客不知春向柳邊深  
三旬禁足持僧戒  
終日看書養道心  
露草帶雲眠野鹿  
風枝搖月唳幽禽  
一塵不到爐煙靜  
自向空寮續近吟

旅邸

湫隘囂塵不可居

晏子宅  
左傳

卜諸清曠亦蘧廬

卜諸清曠  
仲長統

雖無傍水梅依竹  
喜有對樓人讀書  
工雀一枝聊爾耳  
戰蝸兩角竟何如  
西風漸勁未歸去  
空說張翰憶膾魚

欽定四庫全書

江湖小集  
卷四十

五

張翰字季鷹  
翰作去聲非

記顏

五十一年前素昧相逢元是鏡中人  
他時鶴髮雞皮樣  
却道今番畫未真

身後寄顏

生前喜作死規模  
強把冠裳束幻軀  
兒輩對人拋好語  
吾家南極老人圖

次韻

燕子虛簷教子飛，風簾不捲和新詩。  
綠陰滿徑蜻蜓小，正是梅黃欲雨時。

春事

春事又如此，猶人欲老時。  
綠稠煙外樹，白緊鬢邊絲。  
天道有還日，吾年無返期。  
從今安適境，莫放酒杯遲。

晚春

遊事一番了，愁多鎖畫長。  
因思來歲賞，未必少年狂。  
野鳥學蠻語，岸花浮楚香。  
魚應知我者，圍圍到池塘。

琉璃砲燈中魚

頭角未崢嶸潛宮號水晶遊時雖逼窄樂處在圓明有

火疑燒尾

魚化龍時雷火燒尾出封氏聞見錄

無波可動情一朝開混沌

變化趁雷轟

贈陳芸居

氣貌老成聞見熟江湖指作定南針得書愛與世人讀  
選句長教野客吟富貴天街分耳目清閒地位當山林  
料君閱遍興亡事對坐蕭然一片心

伯氏墓下

敬長于今我獨亡轉頭驚見十飛霜心乎愛矣兄如在  
陟彼岡兮木已蒼直喜克家猶有子回思療疾苦無方  
伏波不忍離墳墓

馬援兄卒暮年不離墓所

淚灑歸舟重感傷

次遊十洲之一亭韻

慶元

抵掌論文酒易酣岸巾風外鬢鬢髮十洲所有今之一

七步而成爾乃三

柳公權應聲成文唐文宗曰子建七步而成爾乃三馬本傳

橋壓

平堤波捲綠煙封遠汀草舒藍閣邊得侶評佳境留與

他時作美談

漁村

古柳溪頭枕斷槎  
橫篙掛網幾漁家  
得魚去換紅蒸米  
呼子來挑薺菜花

蠶婦歎

浴蠶纔罷餽蠶忙  
朝暮蓬頭去採桑  
辛苦得絲了租稅  
終年祇着布衣裳

機女歎

機聲唧軋到天明萬縷千絲織得成  
售與綺羅人不顧  
看紗嫌重絹嫌輕

廢墓有感

軒冕委塵埃今人為古哀  
百年邱隴廢幾箇子孫來  
蔓草棲朝露窮猿泣夜臺  
世間類如此當樂且銜杯

掃榻

掃榻卧終日香銷百念除  
不愁渾厭酒無事剩抄書  
粉淺庭前筍青齊雨後蔬  
自嫌猶有累添水種金魚

風雨

昨夜東風急疎窓薦雨入溪南梅正花狼藉隨塵沙皓  
皓多易汙不得全春華春華能有幾紛紛入桃李時哉  
小興衰人生猶物理明發蒼沈聲烏雀喧新晴老農脫  
襪襖一犁原上耕

投所知

中流砥柱一宗臣長把丹衷動玉宸三十四番如此疏  
百千載後更無人堂留薇藥誰知已路長蕭茅謾得春

自是不曾經出處到頭着着為斯民

虎丘

名海湧山 劍池 點頭石 寺乃晉王珣珣宅

心境空時喜地偏杖藜來勘點頭禪重門鎖住海心石  
一劍截開水底天記誰珣珣曾院宇尚傳吳越共山川  
闌風剩月知人意塔影松聲落坐邊

遊園

碧琅玕裏幾亭臺萬朶芙蓉照水開可醉可吟尤可卧  
主人無暇客長來

即事

去去晴雲送客舟  
客舟剛把去雲留  
雲心不定客心亂  
一陣飛鳧兩岸愁

村居

數舍茅茨簇水涯  
傍簷一樹早梅花  
年豐便覺村居好  
竹裏新添賣酒家

半塘寺

今州郡占為納苗之地

寺枕彩雲橋  
殘碑紀晉朝  
地平垂塔影  
林古鎮塘腰  
夜

月松千阜春風柳萬條景多僧住少近覺有塵囂

勲業

勲業占漁蓑因閑學種荷春秋幾燕壘人世一雞窠  
雨急溪聲壯堂寬野趣多狂歌狂且醉還感醉時歌

夜坐

秋院樺涼生看書睡未能扇閒螢撲袂壁破鼠窺燈  
晚境物華異清宵道氣增鄰家猶不寐席地話豐登

偶題

曲肱玩味聖賢書識破人間總畏途  
盛欲對君言所以又應誚我愛之乎  
百年役役鴈來去一夢昏昏鹿有無  
堪笑李鷹猶左計求歸何必待蓴鱸

偶成

醉敲牛角過前村此世應無利祿昏  
有水可漁田可稼即松而徑竹而門  
賓朋連屬琴書樂亭榭參差鳥雀喧  
不假山靈回俗駕會心同是一乾坤

讀騷

舉世昏昏醉未醒，獨醒寂寞楚江濱。  
後人愛把離騷讀，不道離騷誤後人。

偶成

人間總利名，此地此心清。  
雨架筆多潤，風檣琴自聲。  
虛堂回古味，逆境見真情。  
脫帽尋蘆葦，酣眠小太平。

浮世

浮世即浮家，書車與釣車。  
夢中行熟境，塵外立生涯。  
籬落千絲柳，池塘兩部蛙。  
兒曹問農事，穉穉隔田花。

出城

清曉出江城波平覺棹輕煙荷學人老風柳作秋聲歲  
稔時無事心和物有情客來慵與語苦苦問功名

題水竹弟壽山覺庵

照隣營墓牧之銘

盧照隣豫營墓杜牧之自為墓銘

一理融明古亦今

政為後先同此覺不將生死動其心天教棠棣分春色  
地接松楸合晝陰自謂老身强健在時時來和壽藏吟

酒邊次韻

天末星流小似螢因將時事語家庭久晴未厭田多雨  
衆醉難教我獨醒梅下有人編野史竹間猶子課羲經  
晚年喜不為身累閉戶何求阮眼青

荔枝

縵紅紗護水晶團驛騎飛來露未乾胡羯垂涎猶不悟  
馬嵬山底夢長安

橄欖

落盡紅鹽子更青餘甘風韻未為珍從來獨有茶知己

勘破生生一點仁

偶成

江湖千萬頃小艇熟煙波無夢世情薄有吟春思多百  
年空反覆兩鬢暗消磨釣叟同吾志鳴榔柳外過

元夕

夢想傳柑宴村醪可試沽謾酬元夕爾不復去年吾舊  
事思清汴幽情卜紫姑六分春已一秉燭步通衢

野堂即事

纖塵不到芰荷邊  
好向闌干繫小船  
得句未工吟競病  
有書可讀笑便眠  
老於膠擾寧中聖  
暫爾蕭閒即半僊  
人境兩忘天地寂  
一聲柳外咽新蟬

詩贈歸儒

厭作人間粥飯僧  
等閒來續義銛燈

義銛乃葛天民之僧名

近吟

氣味無蔬筍  
舊學工夫尚葛藤  
花下飛鞭身洒落  
風前扶帽髮鬢鬢  
浪僊素不修書問  
有愧昌黎記可朋

打坐

一卷黃庭日未移  
跣趺坐處篆香遲  
兒曹問我新官職  
順適堂中老住持

春去

一片飛花落酒缸  
風光漸覺遠書窓  
草深兩部青蛙鬧  
芹濕重簷紫燕雙

小垂虹橋

馮夷制手開潛蛟  
鎖御雲飛過松江  
左懸腰展鬣眠東湖  
生綃描作垂虹圖  
隱君騎背占空濶  
百尺闌干景軒豁

有亭翼然芙蓉開風朝月夕尤佳哉柳邊何曾官船來  
回視驛橋多塵埃

愛香亭

有君子兮居滄波芝蘭之室未足多為香絕日成癡絕  
不着此亭如香何光風霽月盪心目幸甚吳儂沾賸馥  
茲時消得為衣裳對翁更把離騷讀

偶成

世事如今不可知相逢茶罷且吟詩無風古鼎香煙直

未午空庭樹影遲  
袖手好看碁勝敗  
論心休問酒醇醜  
謀居恰與松江近  
斫膾羹蓴漸及時

舫齋

居家巧作浮家樣  
此即人生不繫舟  
政恐風波起平地  
直教砥柱屹中流  
浪花影動重簾月  
潮汛聲喧萬葉秋  
夢裏不知容膝計  
翻身栩栩逐輕鷗

苕溪行

吳松江頭田舍翁  
年年苕溪搖飛篷  
沿溪楊柳舊相識

問翁何事猶西東，心欲無言淚如洗。松楸正住西山裏，  
余生五十五番春。七十為期春夢耳，追思疇昔謀親塋。  
鴈行差差三弟兄，伯兮季兮不可作。老來隻影嗟零丁，  
手種青杉踰百尺。藤花薜蔓籠臺石，一年一到一徘徊。  
此後徘徊幾朝夕，九泉屬望天潛知。寸草難報陽春暉，  
教子一經答先志。買山傍墓終焉計，讀書可大吾門閭。  
沒世可從先大夫。

次韻

童去鶴歸遲青山皓首期池塘圓草夢家世受梅知拂  
石和雲卧分魚換米炊人生裁足耳舍子更其誰

次撫松韻

昂藏蒼髯翁違世號獨立女蘿千丈絲依倚忘岌岌有  
客眠疎陰感慨百世人不悟女蘿累甘為女蘿親猗歟  
山下蘭清芬傳楚澤野蔓不可干此道何曾息

江湖小集卷四十

欽定四庫全書

江湖小集卷四十一

宋 陳起 編

葉茵順適堂吟稿

晚年闢地為圃僭用老坡和靖節歸田園居六  
韻

太湖三萬頃湖中東西山謀隱媿不早欲往嗟衰年道  
南地夷曠半占龜魚洲斷岸連疎村浮雲棲平田得此  
願可酬不啻湖山間瞻彼閔子巷卜居千載前猶存六

七舍古柳生青煙鄰曲來無時為予喜欲顛疇知在塵  
境中有風月間吾將老此鄉草木俱欣然

二

已受鱸鄉招柴車異塵鞅方春融融時紅紫形夢想勝  
遊計自今樂事何曾徃迎意引壺觴班荆集少長容膝  
地有餘意不在衰廣牧豎良知心長歌振林莽

三

蠶姑饋新蛹籬落桑柘稀一蠶視萬事浮生同于歸水

淺涼可濯荷深香可衣載言老圃計勇決無依違

四

疏牖炷栢子日與琴書娛已復迴商飈涼意浮郊虛自成松菊趣不雜軒冕居悠悠鳥脫罟局局兔守株試叩塞上翁得喪為何如元亮抱至道詩發道之餘利名莫能束精神游太虛冥想田園歸其樂無時無

五

控驢灞橋坳縱棹剡溪曲繽紛天上花拍拍春意足能

追茲辰歡獨許蘇玉局憧憧市朝人繼晷猶秉燭野翁  
太無營借暖待晴旭

六

結廬田疇間稔步東西陌時哉休且休聊以適吾適汗  
漫游難逢崦嵫日易夕篠影延戶深苔暈補階隙而有  
蛙蚓居口腹猶役役顧予安一間頂踵蒙帝績發為四  
時吟吟中自規益

鱸鄉道院

步兵舊游地野人今結廬千載同一調志隱不志魚

光風霽月

濂溪有此天天外得此景景中一衰翁融入吟哦境

耕釣境

一犁足春雨一絲搖晴風樂此至樂地其惟蓑笠翁

春詠

舍瑟聲不傳詠歸聲在道風乎野外濱夕陽轉芳草

見天地心

梅

百卉伏窮陰一枝倚春色因易探真機生意何曾息

存方寸地

桂

客問燕山地燕山地不多秣因解培植桂子綠婆娑

翠波

竹

蕭疎拂行雲清陰籠遠汀水色元無色相逢眼自青

皆春

一氣融萬象大哉造化仁自耕還自鑿熙熙康衢民

塵外

門

自有此山局疑與浮世隔清風襲我裳竹下有來客

雲思

松檜

交柯靄蒼寒不礙青霄路油然隱者心一聲孤鶴度

道院

園林慳十畝天賜老生涯雪境吟終夜春時醉一家籬  
疎簪菊種石古絡藤花莫有同盟者多煎穀雨茶

舟中即事

草舍密還稀編籬枕釣磯鴨羣迎棹去牛背曬衣歸風

卷四十一  
緊浪千疊村深柳四圍倚檣無與語數鴈失斜暉

新春

老來分外喜新春春事關心世事輕棊肯輸時方是著  
路疑險處不須行雨催農業鳩夫婦風帶邊聲鴈弟兄  
辦得斗園隣屋角剩栽芝朮了餘生

嚴子陵

怕被劉郎認故人披裘釣澤隱餘生無端伸足龍牀上  
多却嚴陵一姓名

陶淵明

喚得歸來是督郵東籬千古占風流白衣未至秋蕭索  
曾記公田種秫不

賈浪僊

舉世知心獨有韓為何無髮強加冠若人了得推敲事  
僧服儒衣一樣看

孟東野

出任因詩忤長官布衣時節更孤寒長安得意春風裏

百歲都來一日歡

次韻

舉世一枰碁誰能着着奇懶皆安樂法醉即太平時梅  
雨飛不斷茶煙凝欲垂吟詩為無事多事又因詩

天童山

着足萬松關東州第一山聽泉窮地脉厯棧近天顏奎  
畫疎烟外鐘聲遠樹間衲翁曾有約分我片時間

次守歲韻

爆竹散千災從今事事諧  
五辛空餽釘六甲已安排  
井貯屠蘇藥庭輝楫拙柴  
謾教添一歲依舊好情懷

道院偶成

水生遠岸拍蒲芽春色駸駸染物華  
伎儂一時安老草  
眇昏兩眼眩空花  
樓分古柳煙光薄  
橋倚青帘日影斜  
此樂未知誰可共  
隔籬獨許釣魚家

又

柳長柔絲草長芽  
隨時委化答年華  
呼來便了能酤酒

抱去添丁共看花憂世中宵心耿耿題春半壁字斜斜  
江湖風月今猶昔能學龜蒙有幾家

次韻

鬢邊驚雪點腰下欠金圍已絕功名想甘為耕釣歸浮  
生醒亦醉往事是耶非獨有樓前景年年霞鷺飛

二十里雲亭

杖錫山

蔽空青不斷杉徑影中行僧指夜無月客嫌春少晴卧  
龍安舊窟倦翼亂歸程吟到長虹背人間天上驚

田父吟

桃花深映水邊莊  
夫婦相攜笑語香  
耕耨有糧蠶有種  
丁男戽水女條桑

又

家家柳色染輕黃  
柳外歸鴉噪夕陽  
屋角有煙青不斷  
糶兒飯熟淡齋香

又

羣來野雀遶林梢  
三五人家住水坳  
翁媪語人年歲好

屋山添得一層茅

又

未曉催車水滿溝  
男兒鬼面婦蓬頭  
但求一熟償逋債  
留得糠粃便不憂

又

往來雞酒樂村村  
一稔難忘大造恩  
糶穀可酬婚嫁願  
今年好事屬柴門

僧舍小泊

屏息小胡牀心魔已受降香留烟出戶雲過雨來窓自  
許參禪觀誰能折慢幢山童求說偈竹影落寒江

雪

嘲王竹齋

春意滿庭除紅塵半點無山川同變化天地一糝糊石  
友聳冰骨松公掀壽鬚相望王子宅不見夜蓬孤

梅

溪橋一樹玉精神香色中間集大成疎影逼真前處士  
羣花推重老先生春回隴首人千里月到窓前夢五更

甚欲折來還不忍歲寒留取看崢嶸

次韻

幾載江湖兄弟心老夫吟了聽君吟休論聚散時難易  
要識推敲意淺深晝靜牀頭便竹簡風清牆角度松琴  
山靈應是馳山檄知向孤山何處尋

又

古貌如君更古心艤舟來伴故人吟十分酒醉憂時切  
一點燈昏語夜深半似畫圖經雨壁不成宮社亂風琴

箇中好辦栽梅計勝友從教載月尋

次得雨韻

畎畝思國事箋天淚成流鮮風鼓中夜凍雨喧西疇一  
飽將如願卒歲應莫愁料得廊廟心猶懷溝壑憂香燈  
荅帝力篋笠懸車頭白首逢三登酣歌娛春秋

次吳菊潭八月十四夜韻

來夕九秋半月同心迹清已知千里共祇欠一分明流  
水徃來影片雲今古情撞鐘先得句塵世不須驚

又

月過市無聲令人毛髮清連村三鼓急隔水一燈明琢  
句醉時語簪花老後情凭欄發長嘯不管卧龍驚

又

十六夜月

昨雨轉今晴晴新越樣清恐孤秋半賞為補夜來明檢  
點有斜影看承無異情微吟樵唱句猶恐鬼神驚

杜工部八

月十六夜翫月谷口  
樵歸唱孤城笛起愁

喜義莊成

以義名莊遺後昆隱然文正典刑存當知疎遠諸親族  
同是高曾下子孫先世家風傳不墜廢祠香燼喜重溫  
更能培植詩書種忠孝他年萃一門

多景樓

北望中原慘莫煙樓頭風物故依然後人拍得闌干碎  
往日輕教眼界偏水撼金焦聲亦怒雲連楚泗勢猶全  
壯懷且付生前酒千古英雄冢道邊

旅况

未慣秋情緒客中方覺難酒慳疏舊識衣薄怯新寒雨  
過浮雲濕風來病葉乾倚樓搔短髻一鴈掠闌干

讀梅雪村詩

雪村吟有稿名峻斗牛低聲調唐之上精神江以西愛  
君憂國意臨水傍山題何代無風雅人心自驚鷄

北窓 僧舍

八面璫瓏靜向陰靜中時現定中身解傳佛祖從前意  
便是羲皇向上人背日一簷渾不暑依山百卉若為春

未逢惠遠相招致，厭殺浮生有劫塵。

桂謝

廣寒世界放新晴，景物蕭疎八月深。  
窓外方疑天雨粟，風前已見地流金。  
舉留清致為詩助，收拾餘香付酒斟。  
但得僊根耐霜雪，不妨攜屐步繁陰。

次襍帖韻

梅花舊刻字將磨，勘辨其如病眼何。  
千載鼠鬚遺墨少，一時麈尾誤人多。  
肯將金谷序文比，因想山陰氣候和。

最喜孤居山下姥慕名特特為烹鵝

寄社友

近來何事倦於吟豈是因吟誤却身此道自來多冷淡  
郊寒島瘦少陵貧

買魚

柳線穿來網上魚寬償所直辦朝厨烹鮮不及為親養  
一笑分羹問二雛

石佛

一段無情作有情如來相貌十分真不因人世皆塵土  
誰識山頭不壞身

僧舍偶成

枝頭紅白亂飄零又是風光入柳汀自笑半生成草草  
不知雙鬢已星星貪吟為有詩磨勘戒飲從教酒勒停  
旋學禪林諸衲子蒙頭相對一函經

謝韓菊山道院詩

正傳國子先生印遠訪松陵隱士廬二十四篇風月句

幾千萬卷聖賢書地偏自覺因人重日涉從教與世疎  
已戒園丁多種菊重來對菊膾鱸魚

晚秋即事

曳筇獨倚柴扉翠潑西山漾落暉衲子頂雲隨鴈遠  
牧童腰笛挽牛歸

晚梅

錦樣桃花占曉晴桃邊梅樹尚寒英莫羞老大無顏色

自是前賢畏後生

杜詩不覺前賢畏後生

友人見借放翁絕筆

放翁今已矣猶有未刊詩閱藁無三豕還書欠一鴟聽  
兒弦誦罷留客笑談時發越吟邊思心香答所知

水天一色亭上即事

芰荷深處小壺天時見征帆破晚煙非主非賓和氣裏  
似晴似雨綠陰邊凭闌笑語驚魚鳥信步遊行廢管絃  
剩喜利名塵不到持竿柳下問漁船

又

得得尋幽到水天  
開樽洗勺動庖煙  
敗懼紅袖翻棋局  
慣客烏衣拂坐邊  
好景自應分半席  
雅歌政不欠繁絃  
黃昏未忍輕歸去  
長笛一聲何處船

遇風

捲地沙塵撲面來  
音離歸舟不進去  
帆飛世間何事無  
遲速逆者由來順  
者機

次台州巾子山任翻韻

天留勝處占清涼  
山挾波光薄我裳  
看遍塵寰興廢事

竹陰千古一禪房

舟次

輕舟小駐綠楊隄  
載得閑雲過別溪  
雲本無心天欲暮  
一聲何處杜鵑啼

壽水竹弟

以疾留秀野園

人生真樂在家山  
况有名園五畝寬  
眼底不隨花富貴  
水邊長報竹平安  
養心澹泊千詩藁  
種德蕃滋九畹蘭  
以此壽君君必壽  
年年新月照杯盤

秋夜

秋滿讀書林  
篝燈報夜深  
肯閑詩有趣  
為拙仕無心  
驚鵲擇枝宿  
幽蟬抱葉吟  
未能游夢境  
何處搗衣砧

江湖偉觀山亭

結束虛亭近  
太清山光水影互  
逢迎人心祇覺山多險  
幾箇人心水樣平

又

輒紅塵外聳  
峩峩題品先  
曾屬老坡立  
脚愈高天愈闊

靜看舟楫駕風波

次七夕遊松江韻

謫仙歌洞庭坡翁賦赤壁逢時汗漫游元不計何夕慨  
慷晞英豪老大謾悽惻矧茲笠澤區萬頃混空碧一葦  
縱所如卧虹控秋色雲輶駕雙星銀潢幾經厯柳州乞  
巧文我欲為已易邂逅竹林賢胸次小八極氣勝棊聲  
高量寬酒杯窄載笑輕公侯一間抵金壁多謝簡齋孫  
遺詩話平昔二雛掖吾旁對景亦自得髣髴真率會相

與鄙肉食駐睇芙蓉邊擬卜子雲宅清風繼三高名利  
焉能役因誇江上人有此坐中客

試問

在在江湖蘆葦家家楊柳樓臺試問燕鴻心事為誰飛  
去飛來

江湖小集卷四十一

欽定四庫全書

集部

江湖小集卷四十二至五

詳校官中書臣張姚成

助教臣常循覆勘

覆校官主事臣龔敬身

校對官助教臣胡予襄

謄錄貢生臣崔堂

謄錄貢生臣苗序洙

欽定四庫全書

江湖小集卷四十二

宋 陳起 編

葉茵順適堂吟稿

己酉九日次靖節是歲是月韻

采采籬下菊熙熙白首交  
挈觴酬佳節先驚蒲柳凋  
日  
月不再與名位空相高  
歸然龍山青千古擎丹霄  
彼美一晉士長揖辭塵勞  
留錢寄酒家快飲如沃焦  
尚友前輩意兀兀而陶陶  
且了今日歡誰能憂來朝

長相思

追和姜梅山特立韻

長相思情萬折年少不來春又別寶奩香繡幃月鴻鴈  
音信稀鴛鴦魂夢絕尚持百年願料理丁香結

松江

占得中吳第一清蓴鱸里社可鷗盟七層燈火重湖影  
千尺闌干兩市聲欸乃歌分長短律徃來帆帶古今情  
三高豈是無名利祇與時人有重輕

南明樓

僧舍

重簷敞處受槐薰掃盡江村雨後雲佛法本無南北異  
世情強為晦明分箇中苟住元無住此外無聞却是聞  
誰道結樓人已去牀頭詩版幾朝曛

壺中林壑

山下水一泓山上雲一朵有塵飛不來終年風月我

柿葉

柿葉紅如染橫陳几席間小題秋樣句客思滿江山

道院

菰蒲衛竹居適意是江湖富貴諸公有清閒舉世無四  
時盤谷序一景輞川圖何處無芳草堪嗟楚大夫

旅中

節序幾循環重來秋又殘霜晴生酒熟風冷夾衣單未  
羨千鍾祿寧求一枕安白頭逢歲稔憂國素心寬

寄台守

半世困塵埃煙霞入夢來誰能縮地脉我已思天台城  
古清雲氣山靈秀藥材春時穿徑去郡守莫驚猜

林和靖祠

鶴去山孤草亦荒  
旋吟長句謁虛堂  
東翁尚擬人如玉  
一朶梅花當瓣香

三高祠

一為功成一見幾  
一逢叔世老漁磯  
後人欲隱求其志  
志不因時隱亦非

白牡丹

洛陽分種入侯家  
魏紫姚黃謾自誇  
素質不為顏色污

看來清得似梅花

生日對梅口占

一生已得半生閒出入詩篇酒盞間  
祇把小兒看造化不妨老子號癡頑  
幻身且喜無諸恙靈藥誰能覓大還  
多謝梅花來薦壽年年雪裏破春顏

次王竹齋韻

忘身忘世老方回適處從教節物催  
幾日吟情為熱惱一天生意趁涼來  
屋邊花竹時時好水外軒窗面面開

獨有此君同此趣百年事業兩三杯

漁家行

湖濱江潁疎疎村村漁家長子孫為魚不管波浪惡出  
未天明歸黃昏得來魚可數妻兒相對語甕頭蒸熟鍋  
中無米煮昔日魚多江湖寬今日江湖半屬官釣筒釣  
車謾百尺團畧帆畧空多般蓋蓑臘雪楊柳岸籠手西  
風蘆荻灘差差舴舺千百隻盡向其中仰衣食幾謀脫  
離江湖歸犁鉏似聞歲惡農家尤費力

石湖

千古湖山人物百年翰墨文章寂寞梅花開處一尊自  
酌寒香

蠶婦吟

九日三眠火力齊五朝又報四眠時辛勤一月方能蠶  
繰得成絲却賣絲

又

掃下烏兒毛樣細滿箱山葉剪青柔大姑不似三姑巧

今歲線絲兩倍收

諺有大姑拙  
三姑巧之語

### 昭君怨

塞上將軍且罷休  
一身萬里自經營  
將軍歌舞升平日  
却調琵琶寄怨聲

### 自適

澹薄野人心難教  
着利名重農田舍  
熟省事世情生石  
老旗槍葉池喧鼓  
吹聲東風知此樂  
飛絮蕩新晴

### 霽後

半日斷梅雨兩山生火雲窓明書少蠹壁潤帳多蚊無  
計清時暑何心解世紛追思河朔輩倚筇對爐熏

垂虹橋

松江居橋之東  
太湖居橋之西

何年現采虹懸足控西東兩地烟波隔一天風月同艣  
聲搖鴈柱簷影覆龍宮敵帥曾垂釣誰收餌敵功

意亭

泉石聊復爾杖屨亦偶然萬化同一適魚鳶兮天淵

野雲庵

變態分陰晴悠悠浮太虛冥與此心契時哉道卷舒

鶴隴

一隴以鶴名疑是終南徑山靈無獻嘲出處由來定

雪磴

不記門前路門前一尺深梅花如有語參透老逋心

槃磧

盤旋山水間隱者固所樂寐寤獨言時畎畝心猶昨

耐久交

石

彼哉市道交出語指天日未逢魏與裴三歎扁斯石

意行橋

枯槎浸清溪飄飄野雲度徘徊徘徊撚髭未成句

次游法喜寺韻

招提四百載不與世劫俱松陵拱空覺栢香祠真如時  
秋兆嫩涼揖客登其廬廊邃碑篆剝閣迥鐘聲疎中有  
白足侶光現摩尼珠勘問點頭石奔走闕心狐坐我六  
和室風回晴窓虛碁局迭勝負譁音發酒餘飽分蔬筍

供似可山林居同是百年客得此一日娛遠社不復見  
孰與斯人徒松日簸斜影麾兒呼移厨駕流來鱸鄉野  
雲粘菰蒲客散漁火稀冉冉吟蓬孤

次韻

枯坐如僧欠鉢單年來夢不赴槐安稀行種竹容風入  
大字抄書就月看為有故人同冷淡非干明主棄孤寒  
因閑悟得家山趣堪笑世間行路難

次韻

過墻新竹粉痕粘蛙鬧池塘燕掠簷自喜江鄉成懶散  
從教世界要莊嚴稻秧井井畦千緯荷葉田田水一匳  
心事太平風物好與人無愛亦無嫌

又

難把來箋向後粘載持珠玉傍風簷吟根此桂辭平易  
學本於經意簡嚴未遜彌明聯石鼎還嗤韓渥賦香匳  
陽春政不容人和自聽巴音亦自嫌

香匳體

相思獨向小窓明  
試剪春衣趁晚晴  
還覺此情絲樣小  
欲裁不斷奈何情

又

雌蝶雄蜂綴杏枝  
此時此意妾心知  
等閑繡在香囊上  
寄與東風贈所思

又

千里相思兩寂寥  
東陽應減舊時腰  
書中喜有歸來字  
攜傍紅窓把筆描

又

綠楊紅杏鬧牆頭  
畫出眉山却帶秋  
一行珠簾休捲上  
怕春知道有人愁

又

倚樓目斷暮江邊  
約定歸期夜不眠  
香篆有煙燈有暈  
笑移針線向牀前

秋感

蘋洲起壯風  
秋事太怱怱  
節候一番別  
心期幾處同  
牛

沉苔暈碧，蠹斷蓼拖紅。牛沉蠹斷皆田舍物有客愁無奈，人生總

客中

泊然亭

僧舍

舉世正營營，閑中意味深。無憂伸足夢，自樂曲肱吟。火  
輭香凝穗，簷虛樹長陰。客來難舉似，指水印禪心。

菊

壽客若為情，風流友麩生。殿秋安晚節，為隱被香名。香之

隱逸出

愛蓮說 曼衍南陽種，淒涼楚澤英。見山應自語，今古幾

淵明

一萬推蓬圖

載月船空漾寒綠  
掀篷半卧聽漁曲  
誰家留連萬玉妃  
羞露腰肢和面目  
有緣竊見酖酥骨  
靈壑習習生香風  
剡溪藤下路如掌  
憶在西湖煙雨中  
迦葉相迎開笑口  
湯休謝晝幾搔首  
世間不盡有餘機  
除却老禪人解不

晚春

年少逢春不惜春  
惜春還是白頭人  
飛花入坐兒曹舞

細草蒙階醉後鞦韆未羨食前羅五鼎靜看簷隙走雙輪  
此心已與堯夫似同為清時作幸民

用東坡韻賀可山得子

祥光一夜照鄉閭遲曉鄰翁毓鳳雛舉坐已誇沾玉果  
傳家應不負詩書生時恰恰逢秋半長日駸駸課夜餘  
自顧阿戎愚且魯提孩敢說巧相如

再韻賀可山新生彌月

人誇旌表舊門閭梅長新枝鶴長雛八葉可提和靖印

十箱須讀阿宜書，誕彌厥月生無害。積善之家慶有餘，  
準擬一餐湯餅供。奈何逢疾似相如。

春寒

寒禁蕨芽拳，尚小雨緘茶。背舌無香山翁不信春光老，  
祇道儂家未種秧。

次韻

世間何事不何樓，莫為何樓苦苦愁。貴客五更馳寶勒，  
海翁終日對沙鷗。

次范無外孫花翁游法喜寺韻

兩橋橫處放潮回  
橋外花村漲晚埃  
省事老禪門閉早  
焚香對月禮如來

又

江流環合路紆回  
香火千年地少埃  
佛法本從方寸起  
逢人剛道自西來

簡閒雲

咫尺不相見  
隔江應見難  
有孤今雨約  
轉覺暮雲寒  
是

處蓮堪社何時芋共餐相思正無賴鵲喜近闌干

二子讀詩戲成

翁琢五七字兒親三百篇要知皆學力未可以言傳得  
處有深淺覺來無後先殊途歸一轍飛躍自魚鳶

舟行次韻

相逢隱者流同是五湖舟為老銘三住因閒話四休黃  
沙明野渡畫角咽譙樓已踐登山約煎茶更少留

又

河漢淨如流，枯槎便可舟。  
掉頭諸事懶，彈指半生休。  
撼竹風疑雨，依山屋當樓。  
此游情味好，應不待苛留。

自釋

繁紅妬紫，絢前林。杖策來棲花下陰。  
休道游情難似昔，可能他日尚如今。  
乍晴澗曲縈流水，未曉庭臯調野禽。  
畢竟老天憐老子，幽閒斷送一生心。

寄越倅

幾欲扁舟載雪來，可人風月相蓬萊。  
因思渭北吟春樹

消得江南寄早梅應接山川公事省主盟觴詠曠懷開  
何當身與浮雲似朝暮飄飄徃又回

林可山薦毛監場寫梅

漢庭延壽丹青名解使蛾眉休甲兵之子懶作廼翁畫  
直向梅花苦用情筆端不復汚脂粉臨成天地無邊清  
更將此意語君復歲寒應與孤山盟

贈丘虛舟

植杖踞磐石邂逅蹒跚師叩之何方來偃息招龜池杭

蘆訪蓴江臨流弄漣漪春老芳事歇風前蒲差差人景  
與心會聊以聲吾伊作茗話今昔幾逢夜壑移達哉無  
住想遙與蒙莊期名似囿於物非莊所能知三語三不  
答出門賓晴曦

舟中即事

一岸茭蘆何處村小舟蕩漾日黃昏棲鴉散亂風驚柳  
漁火清熒人倚門

次韻

看月過天中貪幽臭味同竹光延野碧燈影染窓紅聽  
客談時務呼兒誦國風還思浮世事到底是匆匆

餞族姪入幕

衝寒謁子陵好挹釣臺清若過多梅處須寬半日程少  
年先器識實地作功名太守賢明甚當如事父兄

道院偶成

把茅為屋竹為城栢子香銷道氣生九十春光花一片  
萬千心事兩三更連村鼉鼓相高下斷浦漁燈半滅明

閉戶和衣尋小榻夢回猶聽讀書聲

邑宰劭農

雙鳧小駐柳邊洲豈是花時作勝遊  
着意勸民躬耒耜終朝把酒話田疇  
三年兩下車塵拜九客同為野景留  
桃李成陰春欲去寸心耿耿夕陽舟

餞友歸侍

閩江閩山相對青照人肝膽寒如冰  
路旁脩松夾古桂風鼓吟髭月隨袂  
君有萊衣我獨無此樂不能與之俱

老夫耄矣君方少喜見功名將遠到歸歟歸歟盍歸歟  
長途玉汝千金軀來秋來作廣寒客相攜醉舞紅塵陌

去去

去去扁舟對晚暉晴和直欲減綿衣風來一陣蘆花過  
祇道春殘柳絮飛

溪上偶成

霜冷信冬晴茗溪半日程正篷辭月色欹枕受松聲漁  
隱前時約山謳古樣情料應朝市客笑我獨為清

又

新月試新晴扁舟夜奔程  
咿啞千萬意暖迺兩三聲  
熟識旅中事生嫌世上情  
願為山簡醉休問伯夷清

桃花

漫山高下武陵花一片紅  
酣散晚霞要識當時秦晉事  
隔溪修竹兩三家

優鉢羅花

九房六瓣瑞天山香色清  
嚴入坐寒不悟岑參題品意

後人祇作佛花者

次韻

竹滿園林水滿溝幽深地位度春秋坐中不可無侯喜  
歌處何須有莫愁別墅簾櫳風颭燕遠村簦笠雨耕牛  
老來應物猶強健多少壯年成夢休

清暉亭 僧舍

半點罽塵不敢留晴光野色自浮游一泉走石夜多雨  
萬竹圍松風似秋  
騰喜有詩堪獻佛從教無骨可封侯

上人回施清閒供蘭芷香中着茗甌

江湖小集卷四十二